

OBRAZOVNI SISTEM U ISLAMSKOJ ZAJEDNICI

OKRUGLI STO ODRŽAN U SARAJEVU
3. I 4. 11. 2001. GODINE
U ORGANIZACIJI REDAKCIJE *NOVOG MUALLIMA*

SVEČANO OTVARANJE

Muharem HASANBEGOVIĆ:

Poštovana braćo, poštovane sestre, selam alejkum.

Zadovoljstvo mi je da u ime Glavnog odbora Udruženja ilmijje Islamske zajednice u Bosni i Hercegovini svima vama na današnji dan zaželim dobrodošlicu, da se u jednoj radnoj atmosferi družimo i da iz toga druženja poteku rezultati koji će, nadam se, imati dalekosežne i kvalitetne posljedice po budućnost muslimana Bosne i Hercegovine, pa i šire. Koristim priliku da posebno selamim Reisu-l-ulemu dr. Mustafu-ef. Cerića, koji je ovu našu inicijativu ocijenio značajnom. Današnji okrugli sto na temu *Obrazovni sistem u Islamskoj zajednici*, s obzirom na entuzijazam prije svega Organizacijskog odbora, kog je imenovala Redakcija časopisa *Novi Muallim* kao i s obzirom na entuzijazam koji ste vi podnosioci referata imali, zatim na entuzijazam koji ste vi učesnici pokazali, koji ste danas prisutni na ovom okruglom stolu, još jedan je pokazatelj da kod nas u Islamskoj zajednici postoji onaj profilirani, snažni, jaki intelektualni kadar koji zajedničkim radom može polučiti i značajne rezultate. U ime Glavnog odbora Udruženja ilmijje i organizatora zahvaljujem Reisu-l-ulemi. Želim također selamiti zamjenika Reisu-l-uleme hfz. Ismet-ef. Spahića, zatim predsjednika Sabora Islamske zajednice Hilmu Neimarliju, te muftije koji su danas s nama, dekana Fakulteta islamskih nauka, dekane islamskih pedagoških akademija, direktore medresa i sve vas prisutne na ovom okruglom stolu. Hvala vam!

Dr. Ismet BUŠATLIĆ:

Poštovani Reis-efendija, Naib-efendija, Predsjedniče Sabora, dragi učesnici skupa *Obrazovni sistem u Islamskoj zajednici*, najprije želim zahvaliti organima Islamske zajednice, koji su razumjeli da je nakon Kolokvija o hutbi, općem govoru vjerujućem narodu, prirodan put, prirodno odabrana tema govoriti o onima i onome što priprema svaki govor vjernicima i svako vođenje vjernika. Stoga zahvaljujem Reis-efendiji, ljudima u njegovom kabinetu, Predsjedniku Sabora i svima vama koji ste pokazali spremnost da učestvujete u ovome

kolokviju i date svoj doprinos u sagledavanju nama izuzetno važnih problema sistema obrazovanja Islamske zajednice. Molim Reis-efendiju da nam se obrati i zvanično otvori početak rada ovog našeg kolokvija.

Reisu-l-ulema dr. Mustafa-ef. CERIĆ:

Draga braćo i sestre drage kolege, es-selamu alejkum,

Lijepo je čuti, naravno, da vam se neko za nešto zahvali, ali ja mislim, ovaj okrugli sto je rezultat napora koji je učinio Glavni odbor sa Muharem-ef. na čelu, Uredništvo *Novog Muallima* i predsjedništvo organizacionog odbora za ovaj kolokvij. Treba, svakako, i da se mi međusobno naučimo da kada neko od nas uradi neku pozitivnu stvar koja je svima nama korisna da mu to priznamo i tako i ja evo činim zahvaljujući Glavnom odboru Udruženja ilmijje i svim ostalima koji su učestvovali u organizaciji ovog okruglog stola. Ovo je značajan događaj za Islamsku zajednicu i nadam se značajan događaj i za svakog od vas pojedinačno. Koliko ja mogu da vidim razvoj Islamske zajednice, ovo je jedan od načina susreta radnika Islamske zajednice na različitim mjestima. Ja sam siguran da ćete vi iskoristiti ovu priliku i da ćemo uočiti važnost da slušamo jedni druge, uvažavamo određena zapažanja koja su izvan mogućnosti administracije i organizacije Islamske zajednice, a posebno u odgoju i obrazovanju. Naravno, ja sam svjestan svoje odgovornosti, kao i hafiz Ismet-ef. za organizaciju Islamske zajednice i za uspostavu određene administracije koja ima svoje limite i svoja ograničenja. Administraciji Islamske zajednice prije svega potrebne su ideje, i ljudi, ali i kazati kako treba sprovesti određenu ideju u funkcioniranju Islamske zajednice. Nema nikakve dileme, ja mislim da se svi možemo složiti da je prava misija Islamske zajednice učenje, podučavanje, odgoj, obrazovanje - i onda očekujemo kao Rijaset Islamske zajednice sa ovog kolokvija da dobijemo konkretne prijedloge kako da mi to provedemo kroz organe i sistem funkcioniranja Islamske zajednice, posebno medresa, akademija i Fakulteta islamskih nauka. Ja bih ovom prilikom, pošto sam i sam pročitao neke referate za koje mislim da su jako dobro urađeni, rekao kako mislim da je važnije da vi međusobno više razgovarate a da mi kao administracija više

slušamo što nam imate kazati. Ja vas mogu uvjeriti da ono što vi ovdje danas, na ovom kolokviju i sutra uradite, da će to obavezivati i mene osobno, i sve one koji rade u administraciji Islamske zajednice. Stoga vas molim da upotrijebite i zadnji trud vaše energije, da nam pomognete da budemo ponos islamu i muslimanima, ne samo u Bosni i Hercegovini nego i šire.

Ja bih vam ovdje predložio jednu ideju, jer možda ćete doći u priliku da se zaustavite na njoj, a to je nešto što sam ja zapazio iz svoga iskustva: najveći problem ili najveća dilema s kojom se susreću muslimani cijeloga svijeta jeste da razluče fundamentalnu od primijenjene nauke. Imam osjećaj da se vrlo često ova dva pojma fundamentalnog i primijenjenog znanja mijenjaju i sukobljavaju. Postoji fundamentalna islamska nauka, kao što postoji i fundamentalna fizika, ali se fundamentalna nauka islama sva ne može primijeniti. Npr. fundamentalno znanje i vjerovanje islama je Džennet i Džehennem, ali se to ne može primijeniti na ovome svijetu. Drugim riječima ahiret se ne može primijeniti na ovome svijetu. Neki su to pokušali kroz inkviziciju i naravno nisu u tome uspjeli i osramotili su se. Ali postoji i primijenjena nauka u islamu, a to se zove fikih i u ovom konkretnom slučaju mi nemamo problema da prepoznamo fundamentalnu nauku islama, ali naš izazov je naći načina kako primijeniti ono što se može iz fundamentalne nauke. Ako nam vi budete mogli dati odgovor, na koji način naši učenici, potencijalni imami, i oni koji sutra treba da nose islam - da nam pokažete - kako da primjenjuju ono što treba primjenjivati u praksi, onda će to biti vaš veliki doprinos, i velika će biti pomoć u administraciji i organizaciji Islamske zajednice. S ovim riječima ja želim da vam poželim uspješan kolokvij, želim da slobodno iznosite svoje ideje, želim da uspostavite plodan međusobni razgovor i ja se nadam da ćete

prihvatiti ovo dobronamjerno i da ćemo biti dosljedni. Molim dragog Allaha da nam pomogne, proglašavam prvi kolokvij o temi *Obrazovni sistem u IZ* otvorenim i želim vam puno uspjeha. Hvala!

Dr. Ismet BUŠATLIĆ:

Hvala hadži Reis-efendiji na toplim riječima. One će nam biti podsticaj u radu i smjer u kojem pravcu trebamo ići. Zahvaljujući Reis-efendiji završavamo ovaj kratki svečani dio i otvaramo radni dio, i prije nego počnemo ne bi bilo pravo a da se ne zahvalimo onima koji su se pobrinuli da se sve ovo održava u ovom lijepom ambijentu, a to dugujemo prof. Ismail-ef. Smajloviću, vojnom muftiji, koji se pobrinuo da naš rad ostvarimo u jednom uistinu lijepom i rekreativnom ambijentu.

Sada predlažem radno predsjedništvo za prvu sesiju, a to su: Dževad Hodžić, Edina Vejo i Remzija Pitić.

Dževad HODŽIĆ:

Vi ste dobili radne materijale. Dobili ste referate za koje smo mi zamolili određeni broj ljudi da ih pripreme. I htio bih još i to da naglasim, to što ovdje ima desetak ljudi koji su od Organizacijskog odbora zaduženi da podnesu neke referate uopće ne znači da je ovaj kolokvij koncipiran tako da ovdje imaju ljudi koji trebaju održati neka predavanja, ostali da saslušaju, nešto dodaju, eventualno nešto prodiskutiraju itd. Ove referate trebamo razumjeti samo kao polazne osnove za diskusiju. Mi vjerujemo da među vama koji niste bili zaduženi da podnesete referate ima i meritor-nijih ljudi iz ovih oblasti, ljudi čije će diskusije biti vjerojatno i važniji prilog u ovom našem razgovoru nego što su to ovi naši referati.

Pozivam dr. Bušatlića da izloži svoj referat.